



ARTIC LIGHT AS
Ramstadvegen 121
3622 SVENE

Saksbehandlar, innvalstelefon
Ola Betten, 71 25 84 76

Runde vestsida fuglefredingsområde, Herøy - dispensasjon for filming

Vi viser til brev frå Artic Light v/Asgeir Helgestad 29.03.2021 med søknad om dispensasjon for ferdsel i Runde fuglefredingsområde i samband med filmproduksjon. Det blir søkt om montering av kamera i inngangen til eit lundereir, samt filming på avstand. Dette skal skje heile hekkesesongen. Vidare blir det søkt om ei enkelt dronefilming av havsulereir som inneheld mykje plast, tau og garnrestar. Føremålet er å lage ein naturfilm som fokuserer på endring og skadeleg påverknad av naturen vår.

Runde fuglefredingsområde blei freda ved kongeleg resolusjon av 30.04.1981. I verneforskrifta pkt III fastset ein verneformålet til: «*Føremålet med fredninga er å ta vare på eit rikt og interessant fugleliv og fuglane sitt livsmiljø, serleg med omsyn til sjøfuglkoloniane*».

Verneforskrifta pkt IV d) fastslår at «*Av omsyn til fuglelivet er det forbod mot all ferdsel innafor områda, og mot ilandstigning frå båt i tida 15. mars til 31. august for områda 1 - 3, og i tida 15. april til 15. august for område 4. I denne tida er det og forbode på nokon måte å skremme ut fuglane ved hjelp av skot, blåsing i skipsfløyter o.l. Desse reglane skal likevel ikkje vere til hinder for grunneigarane si næringsutøving etter dei eigedoms- og bruksrettar som gjeld, eller for ferdsel for dei som høyrer heime på øya. Heller ikkje er det til hinder for ferdsel etter oppmerka stiar til og frå oppmerka utkikspunkt*».

Det er ingen spesielle unntak eller heimel i verneforskrifta for å tillate slik filming. Vi har difor vurdert søknaden etter dispensasjonsbestemminga i naturmangfaldlova § 48 og prinsippa i §§ 8-12, jf. § 7:

§ 8 – Kunnskapsgrunnlaget

Arbeidet i lundekolonien kan medføre ei kortvarig forstyrning, og ved val av ein reirgang i ytterområdet av området vil dette bety svært lite. Erfarne ornitologar kan opptre slik at hekkande fugl ikkje vert hindra i å oppsøke reirgangar og andre hekkestader.



Flyging med drone utanfor havsulekolonien vil tilsvarande utgjere ein kortvarig påverknad. Risikoen ved dette kan vere støyking av fugl på reiret eller kollisjon med fugl i lufta. Ved avbøtande tiltak vil dette kunne skje på ein trygg måte.

Ein dokumentasjon av miljøutfordringane for sjøfuglane på Runde spreidd ut til eit stort publikum vil kunne gje positive verknader på sikt gjennom haldningsendringar og eit fagleg innspel til forvaltinga. Vi finn difor fordelene med dette større enn ulempa ved kortare forstyrningar i samband med filming og kortvarig flyging. Ut frå føreliggjande kunnskapsgrunnlag er det forsvarleg å kunne tillate dette.

§ 10 – Samla belastning

Vi kan ikkje sjå at filminga vil gi noko uakseptabel totalbelastning verken på sjøfuglkoloniane på Runde eller bestandane generelt.

§ 9 – Føre-var prinsippet og § 11 – Kostnadene ved miljøforringelse

Statsforvaltaren ser ikkje at desse kjem til bruk i denne saka.

§ 12 – Miljøforsvarlege driftsmåtar

Feltarbeidet vil skje med stor varsemd. Dette er en miljømessig gunstig tilpassing.

Statsforvaltaren fattar difor følgjande vedtak:

I samsvar med naturmangfaldlova § 48 gjev Statsforvaltaren i Møre og Romsdal dispensasjon frå vernereglane punkt IV a) og d) på følgjande vilkår:

Det blir knytt følgjande vilkår til løyvet:

- a) Løyvet gjeld for avstandsfilming av lundereiret med inntil 2 personar på same tid, og besøk ved kameraet i reiret.
- b) Løyvet til filming ved lundereiret gjeld i perioden 15. april til og med 31. august 2021.
- c) Filming med drone utanfor havsulekolonien kan skje maksimalt i 1 time i heile sesongen.
- d) Flyginga bør skje når det er liten aktivitet ved reira, og tilflyging bør skje frå ytterkant av kolonien og filme kanteir.
- e) Opphaldet i og ved fuglekoloniane skal avgrensast til det heilt naudsynte. Det skal unngåast å plassere seg så nær reirgangar at tilkomsten blir hindra. Dersom arbeidet medfører unormal aktivitet blant fuglane, skal dette stoppast. Medarbeidarane skal bere markeringsvestar slik at publikum skjønner at dette er ein godkjent ferdsel, og ikkje reagerar negativt.

Dette vedtaket kan klagast til Miljødirektoratet innan 3 veker i samsvar med forvaltningslova §§ 28 ff. Evt. klage skal sendast til Statsforvaltaren i Møre og Romsdal.

Med helsing

Bjarne Otnes (e.f.)
fagleiar

Ola Betten
prosjektleder

Dokumentet er elektronisk godkjent